

Agensi kerajaan terapkan sukan rakyat

NILAI - Agensi kerajaan disarankan menerapkan aktiviti sukan rakyat di kalangan pekerja agar permainan tradisional tidak dilupakan generasi muda akan datang.

Menteri Besar, Datuk Seri Mohamad Hasan berkata, sukan rakyat seperti menarik upih, baling selipar, congkak dan galah panjang perlu diketengahkan kembali untuk diperkenalkan kepada generasi muda.

"Zaman kini tidak seperti zaman macam saya muda-muda dulu, banyak permainan rakyat kita main bersama kawan-kawan di kampung, termasuk mandi sungai dan main teng-teng.

"Sekarang ini, ramai belia dan budak-budak suka main futsal, games di gajet-gajet terkini sehingga melupakan permainan rakyat yang sebelum ini kita banggakan.

"Oleh sebab itu, kalau boleh kita mahu semua jabatan-jabatan kerajaan dan juga golongan belia, apabila mengadakan karnival sukan, selitkan sekali permainan rakyat ini agar kita sama-sama dapat merasai permainan tradisional," katanya pada sidang media selepas merasmikan Majlis Penutup Sukan Mahasiswa Negeri Sembilan (SUKNES@U) 2015 di Dewan Universiti Sains Islam Malaysia (Usim), di sini, kelmarin.



Mohamad menyampaikan piala kepada wakil Usim yang menjadi juara keseluruhan dalam SUKNES@U 2015 di Usim.

Turut serta, Setiausaha Kerajaan Negeri, Datuk Mat Ali Hasan dan Timbalan Naib Canselor (Hal Ehwal Pelajar

dan Alumni) Usim, Profesor Datuk Dr Mohamed Asin Dolah.

Pada tahun ini, Usim men-

jadi tuan rumah bagi karnival berkenaan membabitkan penyertaan 19 institusi pengajian tinggi awam (IPTA) dan

swasta (IPTS) seluruh negara dalam sembilan acara sukan dipertandingkan, termasuk sukan rakyat.

Sementara itu, Mohamad berkata, beliau bukan sahaja mahu anak Negeri Sembilan bijak dalam akademik, namun aktiviti fizikal juga perlu diterapkan.

Menurutnya, beliau bangga kerana karnival dianjurkan Persatuan Mahasiswa Anak Negeri Sembilan (Pemanis) itu berjalan dengan jayanya dan berharap aktiviti sebegini dapat dilakukan setiap tahun, bukan lima tahun sekali.

Pada karnival tersebut, Usim berjaya merangkul juara keseluruhan.